

---

# MIGEL LANDA

## Agaz berbetan

(MATRICIko beargina izanekoa)

---

**MATRICI:** Zelan aldatu da zure bizitza erretiroa artu zenduanetik ona?

**Miguel Landa:** Sano aldatu da. MATRICIn emon nebazan azkenengo urteak gogor-gogorak izan ziran, batez be gure sailakoentzako. Euki dodan gaixotasunak ez deust lorik galazo.

MATRICIk, ostera, bai. MATRICIk etapa ezatsegin ori bein betiko itxi eta ohea dan bete bat asiko aal dau.

Neure aldetik, beintzat, asi naz asi be, etapa barrian bizitzan.

MATRICI erreferentziatzen zein neure-neure dan zaitzat artuten dodan arren, belarrietara etorten jatazan ango barrien alde baikorrari baino ez deustot jaramonik egiten.

Sano arin egokitu naz bizitza barrira eta beti euki dot zer eginik.

Ordutegi zeatza eratu deustot nire buruari eta zorrotz-zorrotz beteten dot a. Goizez, arrantzan joan, soloan bear egin eta lagun dodan Zarragagaz (berak aal dauanean) perretxikotan joaten naz, eta arrastiz, zortzi kilometroko ibilbidea egiten dot, egunero egin be.

**M:** Lortu dozu agur-afarian emon jatzun txekoa kobretea?

**ML:** Jakina ezetz, baina egunen baten kobratuko dot. Ori egiteko itxaropenik ez dot galdu, oraindikarren nire eskuetan dago eta.

**M:** Zelango gomutea dakartzu MATRICI berbeak?

**ML:** Sasoi atan, MATRICIren enpresa eredia onena zan neuretzako; orduan, kapitalismoa eta sozialismoa egozanean. Gaur egun, barriz, danak dira sano bardintsu.

MATRICI (kooperatibismoa, atan be) bear egiteko era ezbardina zan, bertan norbera beargina izanda, norberak enpresearen gestioan artuten eban esku, enpresea norberaren zatitza artuta.

Batzar orokorretan esku artuten genduan eta gestino planak goitik beera aztertuten genduzan, geuretzako obakuntzak eta enpresea bera andituteko ziralakoan.

Egundoko taldea zan, geure artean eritxi ezbardinak egon arren, jakina.

Buruzagiak bearginik zeatzenak ziran, danontzako eredugarriak.

Guk geuk egindako bearraren arabekoak, ziran.

Gaur egun, MATRICI azpikontratazio enpresa biurtu da. Bertan, enpresearen kostuak txikituteko eskubear merkea erosten aaleginak egiten dira, eta bearginari bein beti-

ko bearleku eukiteak zein aalik eta dirurik geien irabazteak baino ez deustot ardura.

**M:** Zer lortuten jatzu MATRICIn ainbeste urtean bear egin otean?

**ML:** Zer lotuten jatan MATRICIn ainbeste urtean bear egin otean:

Bizitzan sano baikorra izan naz beti eta gomuta polita lotu jat. Uste dot nire aalmena dan baino bearleku andiagokora elduta lortu nebala, batez be, beargun gazte eta ekintzaileak inguruan euki dadazalako Orreek asko lagundu deuste.

Gauza izan gintzazan taldean bear egiteko, bakotzak eukan onena emoteko. Eskarmentu andirik ez eukanari ikasi neutson, orrek, normalean, asko irakasteko dauka eta.

Gazteen eritxiei entzuten ikasi neban, eta merezi eben baloratu nebazan.

Teknologi barrietako munduan sartuten ikasi neban. Orretarako, olakoetan ni baino askoz be trebeagoak diran beargun gazteak baino apalago ibili bear banaban be. Eurai apurka-apurka ikasten aalegindu nintzan (neuretzako gogorra eta gatxa zalako).

Labur esanda, uste dot MATRICIn pertsona edegiagoa izaten eta, batez be, gazteengan uste ona izaten ikasi dodala, etorkizuna eurak dira eta.

**M:** Zein izan da MATRICIn bizi dozun unerik ezatseginena?

**ML:** MATRICIn emon nebazan azkenengo edunak (2000ko urrian, apur gorabeera) ezatseginenak izan ziran.

Ez dodaz barriro orduan sortu ziran giroa eta gorabeerak gogoratu gura.

**M:** Eta unerik atseginena?

**ML:** Une atsegin edo on asko bizi izan dodaz. Batez e, teknologia barrien ibilbidean ilusino andiagaz asi gintzazanean, esaterako, arlo barribarrirako atea gure aurrean zabaldu zanean.

**M:** Zegaz gomutetan zara CAD-CAM arloa Parisen ikasten ibili zintzazanean?

**ML:** MATRICIn emon dodazan etapetan onenatarikoa izan zan.

Egia esan bear badot, CAD-CAM deritxonaren ganean Parisen ikasi neban bakarria izena baino ez zan izan, tek-

nologia barriak ikasten 40 urtegeaz asi nintzalako, eta neuretzako ordenagailuaren mundua ain zan barria, ze bildurapur bat eragiten eustan. Teklatua apurtuteko bestekoa zan bildurra.

Ostean, neure bearlagunak maisu ziran orretan, ori ikasita jaiio izan balitzaz lez.

Baina gauza bat argi geratu zan, nik neukan eskarmen-tua ekarri neutsen eta eurak niri ordenagailuaren erabilke-rea, eta alkarregaz talde ona egin genduan.

**M: Zegaz gomutetan zara 80ko amarkadan euske-  
ra ikasten asi zintzazanean?**

**ML:** Orduan, umeak ikastolara bialduten nebazan eta etxean euskeraz egiten zan.

Alan bada, neuretzako bearrizan morala izan zan. An bizitzako guztia on-ona izan zan. Bertan egozan ikaski-deak -eta jator-jatorrak ziran eta ederto baten pasau gen-duan.

Geure ama berbetea ikasten joaten gitzazan.

An emondako denporea labur lotu jatan, bearra dala-eta, frantsesari ekin bear izan neutson eta.

**M: Ze eritxi dozu gaur egun MATRICIn indarrean  
dagoan euskera planaren inguruan?**

**ML:** Egundokoa deritxot, trukean bape itxaron barik, oraindinokarren olango asmo politen alde inork aaleginak egiteari, eta smo ori MATRICIko giroa euskaldunentzako bada, birrian nator bat bete-betean orregaz.

**M: Zelango etorkizuna ikusten deitsozu MATRI-  
CIri?**

**ML:** Bearginen aldetik, MATRICI indar andi-andia daukala uste dot, zein enpresa lez be izen on-ona.

Gauza biotan naikoa zuztar sendoak artuta ikusten dot, etorkizunari indartsu aurre egiteko.

Orretarako baina, koordinazino-arloan eta eskura dau-kezan baliabideak erabiltzeko gauza izango diran talde eragileak trebatu bear dira.

Talde orreek eguneratze iraunkorrean bizi bear dabe, elburuak lortu eta merkatuan errentagarriak izan aal izateko.

**M: Esango deuskuzu bizi dozun bitxikeriaren bat  
edo?**

**ML:** Beinola baten, Madrilera bialdu ninduen. Bertan, ordenagailu barri baten aurkezpenera joan bear neban. Bein antxe nengoala, beingoan konturatu nintzan azalpe-nak ingelesez zirana. Alan bada, itzultzailearen laguntzi-noa eskatu neban.

Ez egoan itzultzailerik ekarteko erarik. Koskorrik be ez neban ulertu batzarrean. Batzar atan, eskua altzauta auke-ratu bear izan zan a eta bestearen artean. Inglesez ez nekian lez, geiengoak aukeratuten ebana axe nik be auke-ratuten neban.

Batzarra amaitu ostean, esan eusten batzar a ez zala ordenagailu aren aurkezpen ofizialerako, aren enpresea-ren zuzendaria aukeratuteko baino.

**Iniaki MARTIARTU  
BAKIO**

## NASTEAN

### ASMATZAILLE EUSKALDUNAK

Euskalerria'n asmatzaille asko izan dira eta entzutetsuak, ona emen batzuk:

Goia'tar Flabio: Itxas-gizon euskalduna zan eta brujulea aldatu eban, bost zokodun kutxa ezarrita. Eta brujula izena be boxola'tik ei dator, bost zokoak gogoratuz.

Nabarro'tar Pedro: Polborea gudarako egokitu eban.

Araba'ko Diego: Gasteiz'tarra, 1550n. urtean, matematikak kañoetara ezarri ebazan.

Garai'ko Blasko: Bizkai'koa, ur irakiñaz itxas-ontzia erabilten ikasi eban eta Bartzelona'n 200 tone'ko ontzia orduko 6 km'an eroan eban (1543).

Itziar'ko Juan: II Felipe'ren irakaslea izan zan eta idazkera eder edo kaligrafia'ren arauak asmau ebazan, gaur be Itziar izkia izena daroana. Durangoarra zan (1540).

Urdaneta: Lenengo lur-irudigillea, Mexiko'ko itxas-errekak eta aizeak aztertu ebazan.

Juan de la Kosa: Ameriketako lenengo lur-irudia egin eban eta Kolon'en en 1º pilotoa izan zan (1492). Bizkai-koa zan.

Gaztañeza'tar Antonio: Motriko'ko almirantea zan eta lur-irudi biribillak asmau ebazan 1692n. urtean eta itxas-ontziak egiten onena zan.

Munibe'tar Erramon: Bergara'n 1771n. urtean, platino garbia lortu ebana lenengoz.

Eluyar'tar Fausto: Bergara'n irakasle izan zan eta 1771 urtean wolfran'a egin eban.

Quadra'tar Erramon: Werner sistema asmau eban eta 1803n. urtean metalen taulak argitaratu.

# NON DAGO MATRICI? (I)

Ori itaunori entzunkeran, erantzuna beingoan etorriko jaku burura: Zamudion, gizona, Zamudion! Eta bai, alan-txe da, bada, Zamudion.

Izango dira amairu urte edo, oraindikarren gogoan dodan Joan Aburto Ormaetxegaz, MATRICIko jagolea izanekoagaz, egon nintzan berbetan beinola eta, alango baten, esan neutson, “txo, Joan, jakingo dozak amen, MATRICI dagoan inguruan, egozan baserrien izenak? Zeintzuk izan zoazan?”

Joanek erantzun, “jakingo ez joazat ba, entzun eik ondo: **Beaskoetze, Sendikune, Andkoetzebarri, Talleri, Montorre** eta **Errotatxu**”. Alan bada, entzundako sei baserrien izenak papertxu baten idatzi eta gorde egin neban.

Leengo aldian, baina, lekuz aldatu bear nebala eta, ara a papertxua non agertu jatan. Amairu urte garrenean, gero! Paperean dakarrenari buruan erabili ostean, orren ganean zeozer idaztea ebatzi neban.

Nongo lurretan dago MATRICI eginda? Nortzuk izan ziran lurren jaubeak? Zeintzuk izan ziran euron izenak? Ori guztiori buruan neukala, MATRICIren jaubego pape-retan sartu neban musturra eta andik eta ortik urrengoan irakurriko dozuna lortu neban: lursailen zatirik andiena **Mustrikauri** (lantokia eta bulegoak) izeneko etxekoa zan eta José María Bergara Urbanori erosi jakon, beste lursaila bat **Telleria** etxekoa izan zan eta gizon berberari erosi jakon, beste zati bat (ONAPRES ondoko apartakalekua), eta ez txikerra, **Beazkoetxea** izeneko etxekoa izan zan eta María Teresa Murga Mugartegiren senitartekoai erosi jaken, eta, azkenik, geroago MATRIPLAST egingo zan lekuko lurra **Loagabekoa** etxekoak izan ziran eta leengo Murga-tarrai erosi jakezan.

Ikerketea baina ez zan naikoa, geiago jakin gura neban. Asi nintzan bada beste iturri batzuetara jotzen. Esate baterako, Bizkaiko XVIII. gizaldiko foreazinoetan au idoro neban: (j: jaubea; e: errentadorea).

## 1704. URTEAN

ZAMUDION:

“**Mustricauri de arriba**” j: Antonio Miguel Zaldu Ugarte / e: Lucas Zaballa  
 “**Mustricauri de Jauregui**” j: Antonio Miguel Zaldu Ugarte / e: Lucas Zaballa, Francisco Zuazo  
 “**Mustricauri Hormaechena**” j: Domingo Zuazo  
 “**Tellería**” j: Domingo Larragoiti / e: Joan Hormaecha  
 “**Herrotachúa**” j: Domingo Larragoiti / e: Miguel Goicoechea

DERION:

“**Mustricauri**” j: Pedro Goicoeche Bolumburu / e: Pedro Landeta

## 1745 URTEAN

ZAMUDION:

“**Udaldeguren**” auzoan:

“**Mustricauri**” j: María Lisa / e: Cosme Echebarria  
 “**Beazcoechea**” j: María Lisa / e: Antonio Elorriaga, Lorenzo Elorriaga  
 “**Mustricaurichu**” j: Joseph Zubieta  
 “**Thejería**” j: María Antonia Goitia / e: Pedro Zuazua  
 “**Errotachúa**” j: Joan Joseph Larragoiti / e: Bentura Rotalde

DERION:

**Mungia**ko uriagaz auzotartuta:

“**Loaga becoa**” j: Agustín Ugarte / e: Josepha Arechalde

“Loaga goicoa” j: Agustín Ugarte / e: Joan Goicoechea  
 “Loaga erdikoa” j: Joseph Elordui / e: Joan Bautista Galbarriartu  
 “Elezcarrizaga” j: Nicolás Jaureguibeitia / e: Pedro Elorriaga

**1796N. ETA 1798N. URTEETAN**

ZAMUDION:

“Mustricari” j: Joseph Murga (vecino de Bilbao)  
 “Beascoechea” j: Joseph Murga (vecino de Bilbao)  
 “Sindicoena” j: Joan Zuazua  
 “Rotachu” j: Joan Fermín Larrigoiti

DERION:

“Tellería” j: Joseph Murga (vecino de Bilbao)

Mungiaiko uriagaz auzotartuta:

“Loaga de medio” j: Joan Joseph Elordui  
 “Loaga becoa” j: Joseph Murga (vecino de Bilbao)  
 “Loaga goicoa” j: Joseph Murga (vecino de Bilbao)  
 “Eskerrizaga” j: Joan Antonio Jaureguibeitia / e: Jose Loroño

Alan bada, urrengoan, etxerik etxe aztertuko doguz sei etxeok, egin dogun ikerketa apal onek elduten itzi deuskun lekugino, atan be.

**MUSTRIKAURI**

MATRICIko lurrik geienak etxe onetakoak izan ziran. Aurrerantzean, **Mustrikauri** izena artu dogu izen normalizatutzat, baserri au **Andikoetxea** izenagaz be ezagutua izan bada.

Leenago ikusi dogunez, izen bereko lau etxe egon ziran 1704an, 1745ean bi eta 1796an bat baino ez.

Au azkenau izango da gure sasoirra arte zutunik elduko zana.

Konturatuko gara be, Joseph Murga Bilbon bizi izandako jauna zana aren jaubea. Arena ez eze, beste etxe batzuen be bazan, bera andikia zala adierazoten deuskula orrek.

Alan jakin ez arren be, seguru antzean, bertan errentarorea biziko zan eta arek aldiroan-aldiroan errentea ordaindu bearko eutson Murga jaunari.

1864ko etxe orretako jaubego paperetan ikusten da Manuel María Murga zala bertako jaubea, 1852. urtean il zan arte.

Agiri orreetan ez da agertuten, baina, zenbat solo eta baso eukazan **Mustrikauri** etxeak, eztak, jakina, zeintzuk izan ziran areen izenak be: Manuel María Murgaren semea zan José María Murga Mugartegi, Bizkaiko Foru Aldun Nagusia eta Xemeingo semea izan zana, izan zan urrengo jaubea 1852. urtetik 1876. urtean il arte.

Urte bete geroaga, 1877an, Joaquina Murga Mugartegi, aren Bilboko arrebeak artu eban etxaguntzea, arik eta 1929an il zan arte.

Seme-alabarik ez eukanez, beraren lobeia zan Ramón Murga arana jaunari itzi eutson etxaldea, markinarra zan



1964. sortu zan urtean.

au. Beray, baina, 1942. urtean il zan eta Madrilen bizi eban arrebeari, María Murga Arana, itzi eutson baserria.

María Zamudiotik asago bizi zala edo, etxaldea Gabriel Aretxabaleta Atxutegi Zamudioko baserritarrari saldu eutson 1944. urtean.

Onek, baina, urrengo urtean, 1945ean saldu eutson dana Bilboko José María Bergara Urbano jaunari.

Eta onek, azkenean, MATRICIri saldu eutsozan lurak 1965etik 1978ra bitartean.

Ikusi dogunez, gitxienez 1796 urtetik 1944 urtera arte **Mustrikauri** izeneko etxaldea Murga familiaren eskuetan egon da, orreetariko jaube bat be an bizi izan ez dala. Orra or, bada arrazoa jaubeok landu bakoien lurren izenak denporearen joanean galduteko.

Leen aitatu dogun lez, **Mustrikauri** izena aukeratu dogu izen normalizatutzat. Izan be, jaubego paperetan “**Mustrikauri**” (1852tik 1978ra) eta “**Mostrica-jauregui**” (1919an) agertuten da. Eta orreetariko baten, **Andikoetxea** (“**Andicoechea**”-1877an, “**Andicoeche**”-1965ean) izena be esaten jakola dakar.

Asikera ikusi dogun lez, bertakoak **Andioetxeberri** (Joan Aburtok) esaten deutsoe.

Fogerazinoetan, barriz, **“Mustricauri de Jauregui”** 1704an, **“Mustricauri”** 1745ean eta 1796an agertuten da.

Lurrak sarritan etxearen inguruan egoten ziran, perimetro baten barruan.

1852n. urtean **Mustrikauri** etxaldeak eukazan lurrak **Beaskoetxea** etxeokaz batera perimetro baten barruan egozan eta oneexek ziran aren mugak: **I:** Ignacio Aurrekoetxea eta Isidro Elgezabalen soloak, **Errotatxu** (**“Rotachu”**) baserriko lurrak, **Kuribilondo** (1965ean) edo **Asua** errekea eta **Aresti** baserriko lurrak **-So** eta **E:** **Sinidikoena** (**“Zendicoena”**) baserriko lurrak, burdibide bat, **Arestikolanda** (**“Campa de Aresti”**) zelaia, **Errotatxu** baserriko lurrak, **Telleria** (**“Tejería”**) baserriko lurrak, **Lekundiz** (**“Lescundiz”**) baserriko lurrak eta **Kuribilondo** edo **Asua** errekea - **Sa:** **Loagatorre** (**“Lobaga-torre”**) baserriko lurrak.

1876. urteko agiri batzuetan **Mustrikauri** edo **Andikoetxea** (**“Mustricauri”** o llamado también **“Andicoetxea”**) izenak etxe berberentzako ikusten dira, **Aranoltza** (**“Aranolza”**) auzoan, izena agertuten da, jaubea Manuel Murga eta errentadorea Domingo Aurrekoetxea zirala.

Alan bada, 1910eko Landa Katastroan au dogu:

**Mustrikauri** (**“Mostricauri”**), **Aranoltza** (**“Arenolza”**) auzoan, jaubea Joaquina Murga Mugartegi, lurren izenik ez dau agertuten.

1936ko Baserrien Estadistikan:

**Mustrikauri** (**“Mostricauri”**), **San Antolin** auzoan, jaubea Ramón Murga Arana, errentadorea Marin Aurrekoetxea Bidaurreazaga.

1937ko Basoen Autorpenean:

**Andikoetxea** (**“Andicoetxe”**) izena dakar bertako biztanleak Ignacio Bilbao eta Martin Aurrekoetxea zirala.

1938ko Basoen Autorpenean:

**Mustrikauri** (**“Mostricauri”**) izena dakar bertako jaubea Ramón Murga Arana zala.

1944. urtean **Mustrikauri** eta **Beaskoetxea** etxaldeak bakotxa nebarreba banak artu ostean, urrengo mugak egin ziran **Mustrikauri** baserriarentzako: **I:** **Beaskoetxea** (**“Beascoetxea”**) baserriko lurrak **-So:** **Errotatxiki** (**“Errota-chiqui”**) (Ramón Mota) eta **Telleria** (**“Tejería”**) (Bernardo Aurrekoetxea) baserriko lurrak **-Sa:** **Aresti** (**“Aristi-oeste”**) (José González Arpón) baserriko eta José María Murga Aranaren lurrak **-E:** José María Murga Arana eta Bernardino Aurrekoetxearen lurrak.

1946. urteko Baso Autorpenean:

**Andikoetxea** (**“Andicoetxe”**) izena agertuten da, jaubea José María Bergara Urbano zala.

## BEAZKOETXEA

Guretariko beargin askok ezagutu dogu baserri au. Bera eratsi baino leenago MATRICI aurrez-aurre egoan, sartukera nagusiaren aurrean eskoatara egon be.

1745eko fogerazinoetan agertu zan leenengoz **Beaskoetxea** (**“Beascoetxea”**) izena, 1704ko fogerazinoetan, ostera, **“Mustricauri de arriba”** izenagaz agertu zan arren. 1796-1798ko fogerazinoetan (**“Beascoetxea”**) Joseph Murga jauna, Bilbon bizi zana, aren jaubea zala dakar.

Bertan errentarorea biziko zan eta arek aldiroan-

aldiroan errentea ordaindu bearko eutson Murga jaunari.

Asikera aitatu dogun lez, agoz **Beaskoetxe** (Joan Aburtok) esaten jakola etxe orreri. **Beaskoetxea** aukeratu dogu idazteko erea, izen normalizatutzat. Izan be, jaubego paperetan **“Beascoetxea”** (1852tik 1992ra) agertuten da eta.

**Mustrikauri** eta **Beaskoetxea** baserri bi izan arren be, bitzuak izan ziran jaube batenak, eta goian **Mustrikauri**ren ganean esandakoak emen **Beaskoetxea** baserriarentzako be 1942 urtera arte balio dau.

Orduan, jaubea Ramón Murga Arana izan zan, baina berau 1942. urtean il zan ezker, Xemeingo José María Murga Arana aren anaiaren eskuetan lotu zan baserria.

Onek alabeari, Markinako Maria Teresa Murga Mugartegi, itzi eutson etxaldea 1968. urtean.

Maria Teresa orrez ez eban euki seme-alabarik eta zaar zala, Manuel Murga Mugartegi nebeari zein loba guztiai itzi eutsen etxaldea 1977an. Orreek **Beaskoetxea** baserria MATRICIri (%10) eta LANKIDE AURREZKI KUTXARI (%90) saldu eutseen 1982an.

Ikusi dogunez, gitxienez, 1796 urtetik 1982 urtera arte **Beaskoetxea** baserria Murga familiaren eskuetan egon da, orretariko jaube bat be an bizi izan ez dala. Orra or, leengoaren antzera, bada, arrazoa jaubeok landu bakoen lurren izenak denporearen joanean galduteko.

1876. urteko agiri batzuetan **Beaskoetxea** (**“Beascoetxea-gaspar”**) izena etxe berberentzako ikusten da, **Ugaldeguren** (**“Ugaldeguren”**) auzoan, jaubea José María Murga zala.

1891eko eta 1892ko Baserriarren Erroldan **Beaskoetxea** (**“Beascoetxea”**, **“Beascoetxe”**), **Ugaldeguren** (**“Ugaldeguren”**) auzoan, izena agertuten da, jaubea Manuel Murga eta errentadoreak Eulogio Aurrekoetxea eta Celestina Gorostiola zirala.

Alan bada, 1910eko Landa Katastroan au dogu:

**Beaskoetxea** (**“Beascoetxea”**), **Aranoltza** (**“Arenolza”**) auzoan, jaubea Jose María Murga Mugartegi, lurren izenik ez dau agertuten, beresi batena izan ezik: **Lukundizalde** (**“Lescundi-alde”**).

1936ko Baserrien Estadistikan:

**Beaskoetxea** (**“Beascoetxea”**), **San Antolin** auzoan, jaubea Ramón Murga Arana, errentadoreak Saturnino Elorriaga Etxebarria eta Lorenzo Etxezarreta Gorostiola.

1937ko Basoen Autorpenean:

**Beaskoetxea** (**“Beascoetxea”**), izena dakar bertako biztanlea Lorenzo Etxezarreta zala.

1940ko Baserriarren Erroldan:

**Beaskoetxea** (**“Beascoetxea”**), izena dakar, errentadoreak Saturnino Elorriaga Etxebarria eta Lorenzo Etxezarreta Gorostiola zirala.

1944. urtean **Mustrikauri** eta **Beaskoetxea** etxaldeak bakotxa neba-arreba banak artu ostean, urrengo mugak egin ziran **Beaskoetxea** baserriarentzako: **I:** erribidea **-So:** **Telleria** (**“Tejería”**) (Bernardo Aurrekoetxea) eta **Errotatxiki** (**“Errota-chiqui”**) (Ramón Mota) baserriko lurrak **-Sa:** **Aresti** (**“Aresti”**) (Zollo Larraskitu), **Aresti** (**“Aristi-oeste”**) (José Angel Arpón) eta **Ezkerrizaga-bekoa** (**“Escarza”**) (Juan Bolunburu) baserriko lurrak - **E:** **Mustrikauri** (**“Mostricauri”**) baserriko lurrak.